

摘藻堂四庫全書薈要

集部

欽定四庫全書蒼要卷一萬九千九百四十四

集部

宋文鑑卷二十一

宋 呂祖謙 編

詩 七言古詩

禁直

楊 億

鳳樓鴛瓦蟾波濕衆籟聲沉百蟲蟄仙盤雲表露成霜
何人夜半牛衣泣芝泥香熟封詔書河漢西傾移斗車
陰風撼撼起庭樹寒澌戛戛鳴宮渠千廬迭唱傳宵警
海山鰲背蓬壺頂金釭珠網結綺錢玉井銀床垂素綆

前席受釐詢碩生觀書百斤須中程投籤乍應嚴鼓節
求衣誤聽蒼蠅聲渴烏漏盡繁星曙魚鑰建章開萬戶
初日瞳矐豔屋梁鳴鞭一聲下天路

滄浪亭

歐陽修

子美寄我滄浪吟邀我共作滄浪篇滄浪有景不可到
使我東望心悠然荒灣野水氣象古高林翠阜相回環
新篁抽笋添夏景老桤亂發爭春妍水禽閒暇事高格
山鳥日夕相啾喧不知此地幾興廢仰視喬木皆蒼煙

堪嗟人迹到不遠雖有來路曾無緣窮奇極恠誰似子
搜索幽隱探神仙初尋一逕入蒙密豁見異境無窮邊
風高月白最宜夜一片瑩淨鋪瓊田清光不辨水與月
但見空碧涵漪漣清風明月本無價可惜祇賣四萬錢
又疑此境天乞與壯士憔悴天應憐鴟夷古亦有獨往
江湖波濤渺翻天崎嶇世路欲脫去反以身試蛟龍淵
豈如扁舟任飄瓦紅蕖綠浪搖醉眠丈夫身在豈長棄
新詩美酒聊窮年雖然不許俗客到莫惜佳句人間傳

希真堂東手種菊花十月始開

歐陽修

當春種花唯恐遲我獨種菊君勿謂春枝滿園爛張錦
風雨須臾落顛倒看多易厭情不專闢紫誇紅隨俗好
豁然高秋天地肅百物衰陵誰暇弔君看金葉正芬敷
曉日浮霜相照耀煌煌正色秀可餐藹藹清香寒愈峭
高人避喧守幽獨淑女靜容羞窈窕方當搖落看轉佳
慰我寂寥何以報時携一罇相就飲如得貧交論久要
我從多難壯心衰迹與世人殊靜躁種花不種兒女花

老大安能逐年少

哭梅聖俞

歐陽修

昔逢詩老伊水頭
青衫白馬渡伊流
灘聲八節響石樓
坐中辭氣凌清秋
一飲百盞不言休
酒酣思逸語更道
河南丞相稱賢侯
後車日載枚與鄒
我年最少力方優
明珠白璧相報投
詩成希深擁鼻謳
師魯卷舌藏戈矛
三十年間如轉眸
屈指十九歸山丘
凋零所餘身百憂
晚登玉墀侍珠旒
詩老薨鹽太學愁
乖離會合喟無由

此會天幸非人謀
頷鬚已白齒根浮
子年加我貌則不
歡猶可強閒屢偷
不覺歲月成淹留
文章落筆動九州
金甌過午無饋餉
良時易失不早收
篋櫝瓦礫遺琳瑯
薦賢轉石古所尤
此事有職非吾羞
命也難知理莫求
名聲赫赫掩諸幽
翩然素旄歸一舟
送子有淚流如溝

和賈相公覽杜工部北征篇

宋 祁

唐家六葉太平罷
宮艷醉骨恬無憂
孽虜詬天翠華出
糲糊戰血腥九州
乾瘡坤疾四海破
白日殺氣寒颼颼

少陵背賊走行在採杞拾橡填饑喉眼前亂離不忍見
作詩感慨陳大猷北征之篇辭最切讀者心隕如搖輶
莫肯念亂小雅怨自然流涕袁安愁才高位下言不入
憤氣鬱屈蟠長虬今日奔亡匪天作向來顛倒皆廟謀
忠骸佞骨相撐拄一燎同燼悲崑丘相君覽古慨前事
追美子美真詩流前王不見後王見願以此語詒千秋

白鵲圖

得黃筌事
於景仁

梅堯臣

雙睛射空眼角聳筋爪入節韝條垂翅排霜刀毛綴甲

雪色愁突秋雲披當時始得不知價朝發海東夕九疑
世為奇俊玩不足奪質移神歸畫師而今挂向深堂上
燕雀屏絕寧來窺畫師黃荃出西蜀成都范君能具知
范云荃筆不取次自養鷹鸛觀所宜毳毛植立各有態
矧奇剔怪乃肯為尋常飼鷹多捕鼠捕鼠往往驅其兒
其兒長大好飛走其孫賣鼠迭又衰范君語此亦有味
欲戒近習無他移

送葛都官南歸

梅堯臣

不羨新為赤縣尹惟羨暫向江南歸江南暮暮梅雨時
風帆差差並鳥飛罾竿夾岸長若梳水籠畜魚鮮且肥
家在千山古溪上先應喜鵲噪門扉

和吳冲卿元會

梅堯臣

千官車馬閭闔來晝漏始上閭闔開我我左右昇龍進
昨夜雪飛雲作堆殿前冠劍魚鱗立東風入仗旗脚迴
黃鐘一奏寶扇掩玳簾卷起香霧排鳴梢未盡霹靂響
翠輦已退黃金階聖人端冕御法座大樂旅作聲和諧

羣公抃蹈丹墀下尚書奏瑞四夷懷乘輿却入更衣閣
通天絳袍陞玉榻百拜稱觴萬歲聞兩廊賜食簪裾匝
曲傳大定舞綴疎波旋煙歛飭宮車衛官解嚴多士退
日光停午氣象舒吳君才筆天下傑歸來作詩傳石渠
石渠秘邃無凡愚石渠酬唱皆嚴徐我慙短學復在後
收餘掇棄聊以書

諭學

孫復

真觀天地何云為茫茫萬物爭蕃滋羽毛鱗介各異趣

披攘攫搏紛相隨人亦其間一物爾饑食渴飲無休時
苟非道義充其腹何異鳥獸安鬚眉人生在學勤始至
不勤求至無由期孟軻荀況揚雄氏當時未必皆生知
因其鑽仰久不已遂入聖域爭先馳既學便當窮遠大
勿事聲病淫哇辭斯文下衰吁已久勉思駕說扶顛危
擊啗毆聾明大道身與姬孔為藩籬是非豐頤若不學
慎無空使精神疲

漁翁

劉敞

白頭老翁披敗簑求魚終日罩淮波波深水闊望不絕
網目雖繁能幾何大魚鱸鱖入淵底小魚鯢鯢登網裏
手皸足趼吁可憐何不為網大如天

朱雲

劉敞

志士不忘棄溝壑勇士不忘喪其元伏鷄搏狸狗襲虎
感激只在精神存漢朝凌替外戚盛五岳振蕩三辰昏
臣彊主弱上不悟廷中唯唯誰能言朱生節義邁金石
面劾不避師傅尊願求尚方斬馬劒誅一厲百清其源

天威振怒不我受利刃接頸雷霆奔當前折檻色不變
命在頃刻誰攀援昔時仲尼魯司寇七日行戮端乾坤
嗟哉此生志不就冥冥后土理其冤漢家社稷變王氏
張禹虛蒙師保恩卓然先見在物表佞臣販國誰復論
我願乘雲歎天閭巫陽掌夢招其魂立朝謇謇辨邪正
無復奸諛開幸門

道傍田家

司馬光

田家老嫗俱垂白敗屋蕭條無壯息翁攜鎌索嫗攜箕

自向薄田收黍稷靜夜偷春避債家比明門外已如麻
筋疲力弊不入腹未議縣官租稅促

虎圖

王安石

壯哉非羆亦非羆目光夾鏡當坐隅橫行安尾不畏逐
顧盼欲去仍躊躇卒然一見心為動熟視稍稍摩其鬚
固知畫者巧為此此物安肯來庭除想當槃礴欲畫時
睥睨衆史如庸奴神閒意定始一掃功與造化論錙銖
悲風颭颭吹黃蘆上有寒雀驚相呼槎牙死樹鳴老鳥

向之俛喁如哺鵲山牆野壁黃昏後馮婦遙看亦下車

張良

王安石

留侯美好如婦人五世相韓韓入秦傾家為主合壯士
博浪沙中擊秦帝脫身下邳世不知舉國大索何能為
素書一卷天與之穀城黃石非吾師固陵解鞍聊出口
捕取項羽如嬰兒從來四皓招不得為我立棄商山芝
洛陽賈誼才能薄擾擾空令絳灌疑

寄贈胡先生

王安石

孔孟去世遠矣信其聖且賢者質諸書焉耳翼之先生與予並世非若孔孟之遠也聞薦紳先生所稱述又詳於書不待見而後知其人也歎慕之不足故作是詩

先生天下豪傑魁胸臆廣博天所開文章事業望孔孟不復睥睨蔡與崔十年留滯東南州飽足藜藿安蒿萊獨鳴道德驚此民民之聞者源源來高冠大帶滿門下奮如百蟄乘春雷惡人沮伏善者起昔時蹻跼今騫回先生不試乃能爾誠令得志如何哉吾願聖帝營太平

補葺廊廟扶傾頽披旒發纊廣耳目照徹山谷多遺材
先取先生作梁柱以次構架楠與櫟羣臣南向帝深拱
戴仰堂陞方崔嵬

丙申歲余在京師鄉人陳景回自南來棄其官得
太子中允景回舊有地在蔡今將治園圃於其
間以自老余嘗有意於嵩山之下洛水之上買
地築室以為休息之館而未果今景回欲詩遂
道此意景回志余言異日可以知余之非戲云

爾

蘇洵

岷山之陽土如腴江水清滑多鯉魚古人居之富者衆
我獨厭倦思移居平川如手山水盛恐我後世鄙且愚
經行天下愛嵩岳遂欲買地安妻孥晴原漫漫望不盡
山色照野光如濡民生舒緩無天扎衣冠堂堂偉丈夫
吾今隱居未有所更後十載不可無聞君猷蜀樂上蔡
占地百頃無邊隅草深野闊足狐兔水種陸收身不劬
誰知李斯顧秦寵不獲牽犬追黃狐今君南去已足老

行看嵩少當吾廬

和渙之深秋月夜書事

狄遵度

洞庭葉下涼颼颼凍天頑白凝不流圓月擬缺不忍缺
輕露欲浮終未浮憶吹朱籟鳳輶上更採紫芝雲嶠陬
玉樓天半幾千尺珠樹玲瓏懸上頭

雨

狄遵度

高林風怒雨聲黑小閣燈背人語闌誰知雲外月高照
定是葉間鶯最寒時覺急飄愁未已似聞徐滴喜初翻

驪駒北首榆關路天晴煙樹沙磧寬

有竇復者世居鎮戎能道邊事

王陶

君不見鎮戎德順弓箭手耕種官田自防守相團置堡
禦蕃軍下視賊庭殊不有殺羊取骨燃艾炙試卜賊兵
知入寇都校招呼入堡居堡外重圍百里餘墻低城小
不難破賊箭如棚城上過堡中不及數十人且鬪且罵
且欣欣登陴斫門謂平取應弦死傷已無數窻間走箭
射酋豪一箭已聞哭聲舉爭將錦囊裹賊尸鳴金收衆

唯恐遲不唯城堡依然固吾衆不傷毫與釐自從干戈
動四鄙覆軍殺將曾無恥朝廷未省遺邊功何事此勲
不聞紀安得天兵百萬衆盡如此輩堅且勇

大孤山

黃庶

彭蠡百年南國襟萬頃蒼煙插孤岑不知天星何時落
春秋不書不可尋石怪木老鬼所附茲乃與水司浮沉
鳴鵠大藤樹下廟祭血不乾年世深舳艫千里不敢越
割牲灑酒來獻斟我行不忍隨人後許國肝膽神所歆

落帆夜宿白鳥岸睥睨百繞寒藤陰銀山大浪獨夫險
比干一片崔嵬心宦遊遠去父母國心病若有山水淫
江南畫工今誰在拂拭東絹傾千金

通判國博命賦假山

陳襄

去年水潦百穀死居民無食食糟粃州之餓者數千人
黃巖之民猶倍徙携持老少出城郭盡徹牆屋無居止
鬻妻棄子人不售價例不復論羊豕白日市井聞號叫
夜堆廊廡如虫豸縣官哀憐發賑救一飯纔得一盂爾

出門未暇充嗾咽已有數十填溝水我時過之不忍顧
往往悲咽胸填委豈無智慮裨萬一遠地不得號君耳
錢侯作倖忠且仁悲憐餓殍如親子日開官廩與之食
又令豪右發儲峙昨日馳書白轉運披陳肝腎獻金矢
更乞兵儲二萬斛民之大命方有倚侯從新年作假山
自聞民饑不得視非無泉石可盤樂人今方瘁何能喜
願侯勿遽愛此山念此腰臘存孤蟻天無疫癘五穀熟
生者保聚歸田里此山之石堅不堅將與侯德無窮已

與子由別於鄭州西門之外馬上賦詩一篇寄之

蘇軾

不飲胡為醉兀兀此心已逐歸鞍發歸人猶自念庭幃
今我何以慰寂寞登高回首坡隴隔惟見烏帽出復沒
苦寒念爾衣裳薄獨騎瘦馬踏殘月路人行歌居人樂
僮僕恠我苦淒惻亦知人生要有別但恐歲月去飄忽
寒燈相對記疇昔夜雨何時聽蕭瑟君知此意不可忘
慎勿苦愛高官職

嘗有夜雨對床
眠之言故云耳

送安惇秀才失解西歸

蘇軾

舊書不厭百回讀，熟讀深思子自知。他年名宦恐不免，今日棲遲那可追。我昔家居斷還往，著書不復窺園葵。朅來東遊慕人爵，棄去舊學從兒嬉。狂謀謬筭百不遂，惟有霜鬢來如期。故山松柏皆手種，行且拱矣歸何時。萬事早知皆命，十年浪走寧非癡。與君未可較得失，臨別唯有長嘆咨。

送劉道原歸覲南康

蘇軾

晏嬰不滿六尺長高節萬仞凌首陽青衫白髮不自歎
富貴在天那得忙十年閉戶樂幽獨百金購書收散亡
竭來東觀弄丹墨聊借舊史誅姦強孔融不肯下曹操
汲黯本自輕張湯雖然尺箠與寸刃口吻排擊含風霜
自言靜中閱世俗有似不飲觀酒狂衣巾狼藉又屢舞
傍人大笑供千場交朋翩翩去略盡惟我與子猶徬徨
世人共棄君獨厚豈敢自愛恐子傷朝來告别驚何速
歸意已逐征鴻翔匡廬先生古君子掛冠兩紀鬢未蒼

定將文度置膝上喜動隣里烹猪羊君歸為我道姓字
幅巾他日容登堂

和錢安道寄惠建茶

蘇軾

我官于南今幾時嘗盡溪茶與山茗胸中似記故人面
口不能言心自省為君細說我未暇試評其略差可聽
建溪所產雖不同一天與君子性森然可愛不可慢
骨清肉膩和且正雪花雨脚何足道啜過始知真味永
縱復苦硬終可錄汲黯少戇寬饒猛草茶無賴空有名

高者妖邪次頑礪體輕雖復強浮汎性滯偏工嘔酸冷
其間絕品豈不佳張禹縱賢非骨鯁葵花玉韉不易致
道路幽嶮隔雲嶺誰知使者來自西開緘磊落收百餅
嗅香嚼味本非別透紙自覺光炯炯粃糠團鳳友小龍
奴隸日注臣雙井收藏愛惜待佳客不敢包裹鑽權倖
此詩有味君勿傳空使時人怒生癭

韓幹馬十四匹

蘇軾

二馬並驅攢八蹄二馬宛頸駿尾齊一馬任前雙舉後

一馬却避長鳴嘶老髯奚官騎且顧前身作馬通馬語
後有八匹飲且行微流赴吻若有聲前者既濟出林鶴
後者欲涉鶴俛啄最後一匹馬中龍不嘶不動尾搖風
韓生畫馬真是馬蘇子作詩如見畫世無伯樂亦無韓
此詩此畫誰當看

贈寫御容妙善師

蘇軾

憶昔射策干先皇珠簾翠幄分兩廂紫衣中使下傳詔
跪捧冉冉聞天香仰觀眩晃目生暈但見曉色開扶桑

迎陽晚出步就坐絳紗玉斧光照廊野人不識日月角
彷彿尚記重瞳光三年歸來真一夢橋山松檜淒風霜
天容玉色誰敢畫老師古寺晝閉房夢中神授心有得
覺來信手筆已忘幅巾常服儼不動孤臣入門涕自滂
元老侑坐鬚眉古虎臣侍立冠劔長平生慣寫龍鳳質
肯顧草間猿與獐都人踏破鐵門限黃金白壁空堆牀
爾來摹寫亦到我為是先帝白髮郎不須覽鏡坐自了
明年乞身歸故鄉

定惠院寓居月夜偶出

蘇軾

幽人無事不出門，偶逐東風轉良夜。
參差玉宇飛木末，繚繞香煙來月下。
江雲有態清自媚，竹露無聲浩如瀉。
已驚弱柳萬絲垂，尚有殘梅一枝亞。
清詩獨吟還自和，白酒已盡誰能借。
不辭青春忽忽過，但恐歡意年年謝。
自知醉耳愛松風，會揀霜林結茅舍。
浮浮大甑長炊玉，溜溜小槽如壓蔗。
飲中真味老更濃，醉裏狂言醒可怕。
但當謝客對妻子，倒冠落佩從嘲罵。

豆粥

蘇軾

君不見滹沱流澌車折軸
公孫倉皇奉豆粥
濕薪破竈自燎衣
饑寒頓解劉文叔
又不見金谷敲冰草木春
帳下烹煎皆美人
萍虀豆粥不傳法
咄嗟而辦石季倫
干戈未解身如寄
聲色相纏心已醉
身心顛倒自不知
更識人間有真味
豈如江頭千頃雪
色蘆茆簷出沒晨煙
孤地碓舂粳光似玉
沙瓶煮豆軟如酥
我老此身無著處
賣書來問東家住
卧聽鷄鳴粥熟時
蓬頭曳履君家

去

答西掖諸公見和

蘇軾

雙猊蟠礎龍纏棟金井輶轡鳴曉甕小殿垂簾碧玉鉤
大宛立仗朱絲鞵風馭賓天雲雨隔孤臣恐淚肝腸痛
羨君意氣風生坐落筆縱橫盤走汞上樽日日寫黃封
賜茗時時開小鳳閉門憐我老太玄給札看君賦雲夢
金奏不知江海眩木瓜屢費瓊瑤重豈惟蹇步困追攀
已覺侍史疲奔走春還宮柳腰支活雨入御溝鱗甲動

借君妙語發春容
顧我風琴不成弄

虢國夫人夜游圖

蘇軾

佳人自鞚玉花驄
翩如驚燕踏飛龍
金鞭爭道寶釵落
何人先入明光宮
宮中羯鼓催花柳
玉奴絃索花奴手
坐中八姨真貴人
走馬來看不動塵
明眸皓齒誰復見
只有丹青餘淚痕
人間俯仰成今古
吳公臺下雷塘路
當時亦笑張麗華
不知門外韓擒虎

郭熙畫秋山平遠

路公為跋尾

蘇軾

玉堂晝掩春日閒中有郭熙畫春山鳴鳩乳燕初睡起
白波青嶂非人間離離短幅開平遠漠漠疎林寄秋晚
却似江南送客時中流回頭望雲巘伊川佚老鬢如霜
卧看秋山思洛陽為君紙尾作行草烟如嵩洛浮秋光
我從公游如一日不覺青山映黃髮為畫龍門八節灘
待向伊川買泉石

任氏閱世堂前大檜

蘇轍

君家大檜長百尺根如車輪身絃直壯夫連臂不能抱

孤鶴高飛直上立，狂風動地舞枝榦。
大雪翻空洗顏色，人言此檜三百年。
未知此是何人植，君家大夫老不遇。
一生直氣未嘗屈，沒身不說歸故里。
遺愛自知懷舊邑，此翁此檜兩相似。
相與閱世何終極，汝南山淺無良材。
櫟社棟椽聊障日，便令殺身起大廈。
亦恐衆材無匹敵，且留枝葉撓雲霓。
猶得世人長嘆息。

韓信二首

黃庭堅

韓信高才跨一世，劉項存亡翻手耳。
終然不肯負沛公。

頗似雍容得天意成皋日夜望救兵取齊自重身已輕
躡足封王能早悟豈恨淮陰食千戶雖知天下有所歸
獨憐身與噲等齊蒯通狂說不足撼陳豨孺子胡能為
予嘗貫酒淮陰市韓信廟前柏十圍千年事與浮雲去
想見留侯決是非丈夫出身佐明主用捨行藏要自知
功名邂逅軒天地萬事當觀失意時

韓生沈鷺非悍勇笑出跨下良自重滕公不斬世未知
蕭相自追王始用成安書生自聖賢左仁右義兵在咽

萬人背水亦書意獨驅市井收萬全功成廣武坐東鄉
人言將軍真漢將免死狗烹姑置之此事已足千年垂
君不見丞相商君用秦國平生趙良顏雪白

杜子美浣花醉歸圖

黃庭堅

拾遺流落錦官城故人作尹眼為青碧鷄坊西結茅屋
百花潭水濯冠纓故衣未補新衣綻空蟠胸中書萬卷
探道欲度羲皇前論詩未覺國風遠干戈崢嶸暗寓縣
杜陵韋曲無鷄犬老妻稚子且眼前弟妹漂零不相見

此公樂易真可人園翁溪友肯卜隣隣家有酒邀皆去
得意魚鳥來相親浣花酒船散車騎野塙無主看桃李
宗文守家宗武扶落日蹇驢馱醉起願聞解兵脫兜鍪
老儒不用千戶侯中原未得平安報醉裏眉攢萬國愁
生綃鋪塙粉墨落平生忠義今寂寞兒呼不蘇驢失脚
猶恐醒來有新作常使詩人拜畫圖煎膠續絃千古無

送范德孺知慶州

黃庭堅

乃翁知國如知兵塞垣草木識威名敵人開戶玩處女

掩耳不及驚雷霆平生端有活國計百不一試薶九京
阿兄兩持慶州節十年麒麟地上行潭潭大度如卧虎
邊人耕桑長兒女折衝千里雖有餘論道經邦政要渠
妙年出補父兄處公自才力應時須春風旂旗擁萬夫
幕下諸將思草枯智名勇功不入眼可用折箠笞羌胡
送謝公定作竟陵主簿

黃庭堅

謝公文章如虎豹至今斑斑在兒孫竟陵主簿極多聞
萬事不理專討論澗松無心古須鬣天球不琢中粹溫

落筆塵沙百馬奔
劇談風霆九河翻
胸中恢疎無怱恩
當官持廉庭不煩
吏民欺公亦可忍
慎勿驚魚使水渾
漢濱蒼舊今誰存
駟馬高蓋徒紛紛
安知四海習鑿齒
拄笏看度南山雲

出城送客過故人東平侯趙景珍墓 黃庭堅

朱顏苦留不肯住
白髮政爾欺得人
嬋娟去作誰家妾
意氣都成一聚塵
今日牛羊上丘壟
當時近前左右嗔
花開鳥啼荆棘裏
誰與平章作好春

武昌松風閣

黃庭堅

依山築閣見平川，夜闌箕斗插屋椽。
我來名之意適然，老松魁梧數百年。
斧斤所赦今參天，風鳴鳩皇五十絃。
洗耳不須菩薩泉，嘉二三子甚好賢。
力貧買酒醉此筵，夜雨鳴廊到曉懸。
相看歸卧僧氊泉，枯石燥復潺湲。
山川光輝為我妍，野僧早饑不能飧。
曉見寒谿有炊煙，東坡道人已沉泉。
張侯何時到眼前，釣臺驚濤可晝眠。
怡亭小篆蛟龍纏，安得此身脫拘攣。
舟載諸友長周旋。

書磨崖碑後

黃庭堅

春風吹船著浯溪扶藜上讀中興碑平生半世看墨本
摩挲石刻鬢成絲明皇不作苞桑計顛倒四海由祿兒
九廟不守乘輿西萬官已作烏擇棲撫軍監國太子事
何乃趣取大物為事有至難天幸爾上皇跼蹐還京師
內間張后色可否外間李父頤指揮南內淒涼幾苟活
高將軍去事尤危臣結春陵三二策臣甫杜鵑再拜詩
安知忠臣痛至骨世上但賞瓊琚詞同行野僧六七輩

亦有文字相追隨
斷崖蒼蘚對久立
凍雨為洗前朝悲
滄洲亭懷古

沈遼

瀟水悠悠天際來
夾江古水抱山回
柵中人物不滿把
日晏市散多蒼苔
九疑巉天古雲埋
遙想帝子龍車迴
心衰目極何可望
九歌寂寂令人哀

縱步湘西

張舜民

今朝不易得天晴
閒過江西取意行
忽然林外見山色
又向橋邊聞水聲
綠竹長松間桃李
天然翠幙圍羅綺

日暮歸舟醉不知晚風吹過湘江水

寒夜

張耒

暗空無星雲抹漆
邑犬叫野人履霜歲云莫矣風落木
夜如何其斗插江屋頭眠鷄正寂寂
野縣嚴鼓先逢逢
摩挲老面起吹火
春色牀頭酒滿缸

謁客

張耒

入門投謁吏翩翩
我非欲見禮則然
異哉賓主兩無語
客起疾走如避燃
我已不恭愧昔賢
恐使塗炭朝衣冠

人生暫聚鴻集川春風吹飛何後先

有感

張耒

羣兒鞭笞學官府翁憐兒笞傍笑侮翁出坐曹鞭復呵
賢於羣兒能幾何兒曹相鞭以為戲翁怒鞭入血流地
等為戲劇誰後先我笑謂翁兒更賢

北隣賣餅兒每五更未旦即繞街呼賣雖大寒烈
風不廢而時略不少差因為作詩且有所警示

耒

張耒

城頭月落霜如雪樓頭五更聲欲絕捧盤出戶歌一聲
市樓東西人未行北風吹衣射我餅不憂衣單憂餅冷
業無高卑志當堅男兒有求安得閒

奉先寺

張耒

荒涼城南奉先寺後宮美人官塋此角樓相望高起墳
草間栢下多石人秩卑焚骨不作塚青石浮屠當邱壠
家家墳上作亭亭朱門相向無人聲樹頭土梟作人語
月黑風悲鬼搖樹宮中養女作子孫年年犢車來作主

卷二十一
廢后陵園官道側家破無人掃陵域官家歲給半年錢
街頭買餅作寒食

美哉

張耒

美哉洋洋清潁尾西通天邑無千里舸舫大舩起危檣
淮潁耕田倍收米茫茫陂澤帶平原古時溝澗還相連
昔人屯田戍兵處今人阡陌連丘墓今年雨足種麥多
北風吹桑鳴空柯高城回望鬱嵯峨豐年閭井聞笙歌
河邊古隄多老柳去馬來船一回首百年去住不由人

歲暮天寒聊飲酒

紫騮馬

許彥國

黃金絡頭玉為轡
蜀錦障泥亂雲葉
花間顧影驕不行
萬里龍駒空汗血
露床秋粟飽不食
青芻苜蓿無顏色
君不見東郊瘦馬
百戰場天寒日暮
鳥啄瘡

墨染絲

郭祥正

縑絲自喜如霜白
輸入官家吏嫌黑
手持退印競傳呼
倏見長條染深黑
墨絲歸織家人衣
別買輸官吏嗔遲

寄言夷狄與三軍汝得豐衣民苦辛

浯溪

潘大臨

公泛浯溪春水船繫帆啼鳥青崖邊次山作頌今幾年
當時治亂春風前明皇聰明真晚謬乾坤付與哥奴手
骨肉何傷九廟焚蜀山騎驢不回首天下寧知再有唐
皇帝紫袍迎上皇神器蒼忙吾敢惜兒不終孝聽五郎
父子幾何不豺虎君臣寧能責胡虜南內淒涼誰得知
人間稱家作端午平生不識顏真卿去年不答高將軍

老來讀碑泪橫臆公詩與碑當共行不賞邊功寧有許
不殺奉皇猶敢語雨淋日炙字未訛千秋萬歲所鑒多
豫章別李元中宣德

謝逸

舊聞諸李隱龍眠伯時已老元中少一行作吏各天涯
故人落落疎星曉西山影裏識君面碧照章江眸子瞭
向來問道渺多歧只今領略歸玄妙老鳳垂頭噤不語
古木查牙噪春鳥身在幕府心江湖左胥右律但坐嘯
第愁一葉釣漁舟不容七尺堂堂表我今歸卧靈谷雲

君應紫禁鶯花繞相思有夢到茅齋細雨青燈坐林杪

聞徐師川自京師還豫章

謝逸

九衢塵裏無停舟君居陋巷不出遊滿城惡少弋鳬鴈
對面故人風馬牛別後坐寒燈火夜歸來眠冷江湖秋
馮驩老大食不飽起視八荒提薊纒

早春偶題

崔鷗

寒風浙瀝鳴枯葦小鴨睡殘猶未起更教細雨結輕寒
坐聽蕭蕭打窓紙石盆養蒲已抽翠雕斛栽花先弄紫

擁爐閉閣賦幽香未怕春水生硯水

阻風雨封家市

李彭

往時李成寫驟雨萬里古意毫端聚行人深藏鳥不度
便覺非復鵝溪素龍眠老院作陽關北風低草雲埋山
行人客子兩愁絕未信蒲萄能解顏兩郎了了解人意
似是畫我封家市戲作新詩排畫睡忽有野鴈鳴煙際

夢訪友生


李彭

少年結客長安城妄喜縱酒一章程支離老去一茅屋

枕書卧聞長短更友生相望止百里寒夜寥聞無微聲
夢中乘興輒見戴剡溪聊爾扁舟行覺來蘧蘧一榻上
不用僮僕爭驩迎吹燈弄筆欲書寄窓前白月方亭亭



宋文鑑卷二十一



總校官庶吉士 臣張能照

校對官中書 臣胡紹基

謄錄監生 臣劉耀馥

欽定四庫全書薈要

集部

宋文鑑卷二十四

二至

詳校官候選知縣臣吳國華



欽定四庫全書薈要卷一萬九千九百四十五

集部

宋文鑑卷二十二

宋 呂祖謙 編

詩 五言律詩

中秋月

王禹偁

何處見清輝登樓正午時
莫辭終夕看動是隔年期
冷濕流螢草光凝睡鶴枝
不禁雞唱曉輕別下天涯

送枝江秦長官罷秩

鄭文寶

衆論才名外親人似古人
官嫌容易達家愛等閒貧解

印詩權在移風澤國春政聲交不得慙見數鄉民

送曹緯劉鼎二秀才

鄭文寶

旦夕春風老離心共黯然小舟聞笛夜微雨養花天手
筆人皆有曹劉世所賢柳侯重才子從此看鶯遷

夜泊江上

寇準

歲暮峽中村維舟古樹根羣峰初落月後夜獨聞猿流
水自無盡客愁那可論平明離楚岸迢遞指吳門

春日登樓懷歸

寇準

高樓聊引望杳杳一川平
野水無人渡孤舟盡日橫
荒村生斷靄古寺語流鶯
舊業遙清渭沉思忽自驚

楚江夜懷

寇準

西風生遠水蕭颯度吟臺
明月夜還滿故人秋未來
寒蛩啼暗壁敗葉下蒼苔
誰念空江水年年首重回

題太湖

羅處約

三萬六千頃湖侵海內
田逢山方得地見月始知天
南國吞將盡東溟勢欲連
何當灑為雨無處不豐年

受詔修書述懷感事三十韻

楊億

太極垂裳日中原偃革初樓船秋發詠衡石夜程書好
問虛前席徵賢走傳車蓬萊侔漢制煨燼訪秦餘紬繹
資金匱規模出玉除紛綸開四部祕邃接千廬飫賜雙
雞膳親廻六尺輿華芝下閭闔白羽擁儲胥望氣成龍
虎披文辨魯魚清光無咫尺玄覽亦躊躇羣彥揮鈐筆
微生濫石渠嵇康真嬾慢謝客本空疎講學情田堦談
經腹笥虛月評依許劭文體慕相如雅飲歡娛合清言

鄙吝祛彌旬容出沐終日喜羣居撫已慙鳴玉歸田憶
荷鋤池籠養魚鳥章服畏猿狙還府愁尸祿天閤愧弊
裾虛名同鄭璞散質類莊樗國士誰知我隣家或侮予
放懷齊指馬屏息度羲舒寡婦宜憂緯三公亦灌蔬危
心惟穀疎直道忍蘧蒢往聖容巢許先儒美甯蘧晨趨
歎勞止夕惕念歸歟秦痔疎杯酒顏瓢賴斗儲如諧曲
肱卧猶可直鉤漁矯矯龜銜印翩翩隼畫旗一麾終遂
志阮籍去騎驢

至郡累旬惡風

楊億

鄧禹功曹器馬周令長才叨臨萬室郡驟致五風災大
木行將拔繁雲黯不開自知蒙闇極民吏竊相咍

獄多重囚

楊億

鐵鑱銀鐫衆金科伏念頻絕聞空獄奏深愧片言人清
穎黃公接黃霸為穎川守八年獄無重罪囚甘棠召伯隣懷賢不能繼

多辟豈由民

梁縣界好蛇蟲生

羅處約

方喜雲油布俄聞葉騰生田神何縱虐稼政自非明賴
鳳那充食吳牛已絕耕

牛多疫死

黃堂厭梁肉惕爾自心驚

禁中庭樹

錢惟演

紫闥分陰地丹條擢秀時高枝接溫樹密葉覆辛夷夜
影瑤光接晨英玉露滋乘春好封殖為賦角弓詩

寄楊埧

趙湘

閉門苔自長春恨極天涯落日煙橫水空城雨過花斷
狂曾避蝶多病更無蛙江上無消息風吹渡柳斜

答徐本

趙湘

天遠草離離秋霖寄信遲
相思逢葉盡獨坐聽蟬悲
岳色寒前見松心雪後知
頻招猶未至時復檢清辭

喜故人至

王操

地僻無賓侶柴門晝始開
谿山寒葉落江國故人來
話舊驚霜鬚論詩滯酒杯
相留喜同宿不寐曙光迴

送人南歸

王操

相送當搖落孤舟泛渺瀰
去帆看已遠臨水立多時
別

浦寒鴻下空山夜鶴移它年重會面冷鬢共成絲

南兵

錢易

曾見南兵苦征遼事一如金瘡寒長肉紙甲雨生蛆山
小壑霜骨河枯臚腐魚黎元無處哭丁戶日相踈

上知府寇相公

魏野

文武稟全才何人更可陪有官居鼎鼐無地起樓臺聖
主詩方和親王狀始迴鎮臨求二陝調燮輟三台鳳閣
須重去龍旌暫擁來下車三度雨上事數聲雷未暇瞻

珪壁先蒙活草萊幾思趨相府恐懼復徘徊

書友人屋壁

魏野

達人輕祿位居處傍林泉洗硯魚吞墨烹茶鶴避烟閑
唯歌聖代老不恨流年靜想相尋者還應我最偏

閒居書事

魏野

無才動聖君養拙住山村臨事知閒貴澄心覺道尊成
家書滿屋添口鶴生孫仍喜多時雨經春免灌園

述懷

魏野

東郊魏仲先生計只隨緣任懶自掃地更貧誰怨天有
名閑富貴無事小神仙不覺流光速身將半百年

夏日宿西禪

潘閔

此地絕炎蒸深疑到不能夜涼如有雨院靜若無僧枕
潤連雲石窻明照佛燈浮生多骨賤時日恐難勝

叙吟

潘閔

高吟見太平不恥老無成髮任莖莖白詩須字字清搜
疑滄海竭得恐鬼神驚此外非閑念人間萬事輕

歲暮自桐廬歸錢塘晚泊漁浦

潘閔

久客見華髮孤櫂桐廬歸新月無朗照落日有餘輝
漁浦風水急龍山烟火微時驚沙上鴈一一背南飛

銘坐右

張齊賢

慎言渾不畏忍事又何妨國法須遵守人非莫舉揚
無私仍克己直道更和光此箇如端的天應降吉祥

酬陳齊民見寄

种放

竹扉常晝掩幽僻置身安自委漁樵分因思出處難周

庭方設燎漢將尚封壇莫問漁樵意人寰事萬端

勘書

孫 僅

儒家無外事招客勘青編筆墨東西置朱黃次第研頻
憂傷黥竄細恐誤流傳改易文辭正增加字數全目因
繁處倦心向注中專端坐窮今古披襟見聖賢疲勞時
舉白遊息或談玄得興忘昏旭題名記歲年棲毫思確
論廢卷恨亡篇魚魯皆判定誰人敢間然

江南立春日

呂夷簡

灰律何時應江春昨夜來細風先動柳殘雪不藏梅餘
冷迷清管微和發凍醅閉門無客到樽俎為誰開

秋日旅懷

江為

迢迢江漢路秋色又堪驚半夜聞鴻鴈多年別弟兄高
風雲影斷微雨菊花明欲寄東歸信徘徊無限情

江行

江為

越信隔年稀孤舟幾夢歸月寒花露重江晚水煙微岸
直帆相望沙空鳥竝飛何時洞庭上春雨滿蓑衣

經戰地

魯交

昔時用兵地黯慘無人耕
戰士報國死寒草迎春生
沙飛賊風起晝黑陣雲橫
未持天下筭何以掃樓櫓

大雪

魯交

萬象曉一色皓然天地中
楚山雲母障漢殿水精宮
遠近梅花信高低柳絮風
吟魂清不徹和月上晴空

野水

錢昭度

野水光如壁澄心不覺勞
與天無表裏共月見分毫
綠

好磨長劒清宜汎小舫淡交今已矣惆悵越波濤

塞上作

唐 異

防秋人不到萬里絕妖氛馬牧降來地鵬閑戰後雲月
依孤壘沒燒逐遠荒分未省為邊客宵笳懶欲聞

閒居書事

唐 異

幽居經宿雨屐齒徧林塘一境無過客千山自夕陽晝
禽多獨語夏木有餘涼招隱詩慵寄時清誰肯忘

瀑布

石延年

飛勢挂岳頂無時向北傾
玉虹垂地色銀漢落天聲
萬丈寒雲濕千巖暑氣清
滄浪不足羨就此濯塵纓

曹太尉西師

石延年

仁者雖無敵王師尚有征
獨乘金廐馬都領鐵林兵
肅氣關河暮屯煙部落晴
旗光秋燒去甲色夜江橫
士喜擊中鼓敵疑聞後鉦
無私乃時雨不殺是天聲
濯濯前誰拒堂堂彼自傾
寒逾博望塞春燕隗囂
城外使戎心伏旁資帝道
平公還如畫像為贊學班
生

春

石延年

一氣回元運恩含萬物深陰陽造化首天地發生心有
信來還去無私古到今和風激遺暢南轉入薰琴

赴桐廬郡至淮上遇風

范仲淹

聖宋非彊楚清淮異汨羅平生仗忠信盡室任風波舟
楫顛危甚蛟鼉出沒多斜陽幸無事沽酒聽漁歌

瀑布

范仲淹

迫與衆流異發源高更孤下山猶直在到海得清無勢

鬪蛟龍惡聲吹雨電麓晚來雲一色詩句自成圖

堯廟

范仲淹

千古如天日巍巍與善功禹終平洛水舜亦致薰風江
海生靈外乾坤揖讓中鄉人不知此簫鼓謝年豐

野色

范仲淹

非煙亦非霧幕幕映樓臺白鳥忽點破夕陽還照開肯
隨芳草歇疑逐遠帆來誰會山公意登高醉始迴

八月十四夜月

范仲淹

光華豈不盛賞宴尚遲遲天意將員夜人心待滿時已
知千里共猶訝一分虧來夕如澄霽清風不負期

題養真亭

韓琦

新葺公居北虛亭號養真所期清策慮不是愛精神滿
目林壑趣一心忠義身吏民還解否吾豈苟安人

有將獨鶴行都市道上者左右奔迫野態憔悴因

成短韻

宋庠

明心本霄漢此路極喧埃何意鳴臯罷翻同舞市來波

臣憂轍涸海鳥避風災寄語昂昂質非君羽獨推

春夕

宋庠

暝色蔽孤齋空軒向夕開花低應露下月暗覺雲來燭
牖輕蛾聚風枝倦鳥猜無言聊隱几萬鏡一靈臺

羣玉殿賜宴

歐陽修

至治臻無事豐年樂有成圖書開祕府宴飫集羣英論
道皇墳典貽謨寶訓明九重多暇豫八體極研精筆力
千鈞勁豪端萬象生飛牋金灑落拜賜玉鐙鳴盛際崇

儒學愚臣濫寵榮惟能同舞獸聞樂識和聲

下直呈同行三公

歐陽修

午漏聲初轉歸鞍路偶同天清黃道日街闊綠槐風萬
國舟車會中天象魏雄戢戈清四海論道屬三公自愧
陪羣彥從來但樸忠時平容竊祿歲晚歎衰翁買地淮
山北垂竿潁水東稻梁雖可戀吾志在冥鴻

東閣雨中

歐陽修

直閣時偷暇幽懷坐獨哦綠苔人迹少黃葉雨聲多雲

結愁陰重風傳禁漏過瑤圖新嗣聖玉塞久包戈相府
文書簡豐年氣候和還將鳳池句聊雜野人歌

秋懷

歐陽修

節物豈不好秋懷何黯然西風酒旗市細雨菊花天感
事悲霜鬢包羞食萬錢鹿車終自駕歸去潁東田

東晉

宋 祁

倉卒浮江日聲明建號初羣臣讓禁嚮上宰製單練氣
銳開桁戰心歡折屐書纖兒競撞壞不念好家居

詠史

宋祁

古有容容福人譏齷齪員生貪巧作奏死戒直如弦欲
重高門地非論媚竈天詩書大儒家絲竹後堂旃東閣
翻芻馬西園竊瘞錢道謀誰執咎戶選不因賢朱鼓成
妖日羌雛入賀年須防反室詔終取闔門憐異日讒成
錦先時默似蟬空貽後人嘆流涕掩青編

遣吏視諸公塋樹回有感三首

文正王丞相

宋祁

兩朝崇巨德萬務罄斯猷漢日左右堯年忠孝侯名
言天下滿故事省中留宸篆旌碑首刊文又幾秋子作碑陰
述其事

文靖呂丞相

慶厯公三入虜謀搖太平啖金真間敵撓呼高反酒不寒

盟上印情雖切公被病求退不許然髭疾遽輕上剪髭賜公惜哉天

弗慙宸幄淚先橫

宣獻宋公

昔去歡明辟

明肅朝公
勸還政

俄歸參大鈞公孫未及相諸葛

已傷神名待天淵蔽文爭日月新英魂同玉樹不向土

中春

僻居

燕肅

茅茨城市遠草徑接魚村白日偶無客青山長對門藥
鑪留火暖花塢帶煙昏靜坐搜新句冥心傍酒樽

宋文鑑卷二十二

欽定四庫全書薈要卷一萬九千九百四十六

集部

宋文鑑卷二十三

宋 呂祖謙 編

詩 五言律詩

泛溪

梅堯臣

中流清且平，捨楫任船行。
漸近鷺猶立，已搖村覺橫。
何妨綠樽滿，不畏晚風生。
屈賈江潭上，愁多未適情。

發勾陵

梅堯臣

秋雨密無跡，濛濛在一川。
孤村望漸遠，去鳥飛已先。
向

晚雲漏日微光人倚船安知偶自適落岸逢沙泉

聞鴈

梅堯臣

濕雲夜不散薄處微有星孤鴈去何急一聲愁更聽心
應失舊侶翅已高青冥幾日江湖上鳬鷗共滿汀

和謝仲弓廷評栽竹

梅堯臣

移得溪邊翠來為庭下陰惜根存舊土帶筍助新林暗
換蕭蕭葉知虛寸寸心東風莫搖撼培壅未應深

覽含元殿基因想昔時朝會之盛且感其興廢

蘇舜欽

在昔朝元日千門動地來方隅正無事輔相復多才仗
下簪綈肅天中繳扇開皇威瞻斗極曙色辨崔嵬赤案
波光卷鳴鞭電尾回熊羆驅禁衛雨露覆蘭臺橫賜傾
中帑窮奢役九垓只知營國用不畏屈民財翠輦還移
幸旻天未悔灾羣心尊困獸回首變寒灰曾以安無慮
翻令世所哀行人看碧瓦獨鳥下蒼苔雖念陵為谷遙
知禍有胎青編遺迹在此地亦悠哉

五哀詩

司馬光

孔子惡利口之覆邦家者甚矣讒之為害不可一二數也聊觀戰國以來楚之屈原趙之李牧漢之晁錯馬援齊之斛律光皆負不世之才竭忠於上然卒困於讒不能自脫流亡不得其所而死或者國隨以丘墟此其尤可大哀者也因即其事作五哀詩且以警後世云

屈平

白玉徒為潔幽蘭未謂芳窮羞事令尹疎不忘懷王冤

骨銷寒渚忠魂失舊鄉空餘楚辭在猶與日爭光

李牧

椎牛饗壯士拔距養奇材虜帳方驚避秦金已闇來旌
旗移幕府荆棘蔓叢臺部曲依稀在猶能話郭開

晁大夫

人主恩猶盛讒夫弄舌端旋聞就斧質不得解衣冠反
虜齒纔冷謀臣心盡寒晁宗噍類盡漢室泰山安

馬伏波

漢令班南海蠻兵避鬱林天涯柱分界徼外貢輸金坐
失奸臣意誰明報國心一棺忠勇骨漂泊瘴煙深

斛律光

君臣日荒宴歌舞諱言愁老相猶當國強鄰不敢謀謠
言雖未出姦謗已先流誰察忠臣意通宵抱膝憂

即事

王安石

徑暖草如積山晴花更繁縱橫一川水高下數家村靜
憩雞鳴午荒尋犬吠昏歸來向人說疑是武陵源

招丁元珍

王安石

默默不自得紛紛何所為
畫墁聊取食獵較久隨時秋
入江湖暗風生草樹悲黃花
一杯酒思與故人持

半山春晚即事

王安石

春風取花去酬我以清陰
翳翳陂路靜交交園屋深
牀敷每小息杖屨或幽尋
惟有北山鳥經過遺好音

定林

王安石

漱甘涼病齒坐曠息煩襟
因脫水邊屨就數巖上衾
但

留雲對宿仍值月相尋真樂非無寄悲蟲亦好音

自白土村入北寺

王安石

雨過百泉出秋聲連衆山獨尋飛鳥外時渡亂流間坐
石偶成歇看雲相與還會須營一畝長此聽潺湲

和象之北軒書事

韓維

舍北多嘉樹垂陰及四隣清風常滿竹好鳥不驚人圖
史無它物謳吟佚此身應容里中客一醉倒冠巾

平居

王安國

絺綌散南風平居觸事慵古今無適莫義命有違從水
鳥迎秋舫山花映夕春故鄉圖畫見垂老愧塵容

明皇

鄭 獬

四海不搖草九重藏禍根十年傲堯舜一笑破乾坤寇
賊皆冠冕豺狼盡子孫潼關兵已破會憶老臣言

送趙樞寺丞宰虔化縣

陶 弼

路入南雲下如何輕解携人烟五嶺北星斗大江西暖
雪梅花樹晴雷贛石溪青衫欲無淚不奈鷓鴣啼

出嶺題石灰鋪

陶弼

馬度嚴關口生歸喜復嗟天文離卷舌人影背含沙江
勢一兩曲梅梢三四花登高休問路雲下是吾家

同宋復古遊大林寺

周敦頤

三月山方暖林花互照明路盤層頂上人在半空行水
色雲含白禽聲谷應清天風拂巾袂縹緲覺身輕

冬至

邵雍

何者謂之幾天根理極微今年初盡處明日未來時此

際易得意其間難下辭人能知此意何事不能知

晚涼閒步

邵雍

得處亦多矣風前任鬢斑年過半百外天與一生閒
靜雲間月分明雨後山中心無所愧對此敢開顏

重九日登石閣

邵雍

事出一時間時過事莫閒當時深可愛過後不堪看
夏去休言暑冬來始講寒人能知此理憂患自難干

悟人一言

邵雍

百慮謀猶拙一言迷自開世間無大事天下有雄才唯
恐人難得寧憂道未恢忌心都去盡何復病塵埃

陳公廙園修禊事席上賦

程顥

盛集蘭亭舊風流洛社今坐中無俗客水曲有清音香
篆來還去花枝泛復沉未須愁日莫天際是輕陰

和王正仲熙寧郊祀二十韻

劉攽

駿命膺長發鴻圖本慎徽八方星拱極四海日升暉舊
典增咸秩彌文示表微聖時均玉燭天統正璿璣南極

迎陽復陰泉候氣歸積高常眷顧昭孝每無違羽衛來
雙闕和鑾並六飛風霆齊命令龍虎會旗旂帳殿層城
暮金波列宿稀嚴更虛夜鼓鼙彤輦下彤闈廣樂千人唱
升煙萬目晞衆神知受記衆物競來依陟降兼明察圓
方比範圍送音仍弼弼昇福想霏霏霏澤蘇羣動春陽
暢瑾扉慶深周揭厲感極至獻敬多士參鳴玉微生廁
皐衣肅雍瞻帝武奉引近天威儒館鸞鸞舊長謠錦繡
輝因知子雲賦何足頌巍巍

和鄭閔仲仙居

陳襄

我愛仙居好臨民必以誠簿書無日暇獄訟積年生

子始

至邑豪有以債負憑折細民田土者迹驗分明予治而
歸之或有年深而亡稽者亦妄詞訟三年分戶二千凡
有產而無業積年空納其租許其還主者不可勝數
百疾求歲補千鈞待準平嗟予不如古斯道未能宏

我愛仙居好隆儒甚大方諸生今講藝

予每講書罷又令諸生各轉相

教童子俾升堂

公暇每有童子十數人至堂上教授經書或試之書

買地興民學

因孔子廟後修起學舍買三家之地以廣其基

驅車下黨庠

予每出行諸鄉遇有小學則下以觀

童子三年邑未化官滿意彷徨

我愛仙居好公餘日在房憂民極反覆責已未周詳法
律行隨手詩書坐滿箱老來須向學多病喜平康

和子由初到陳州

蘇軾

舊隱三年別松杉好在不吾今尚眷眷此意恐悠悠閑
戶時尋夢無人可說愁還來送別處雙淚寄南州

廣愛寺朱瑤畫

蘇軾

朱瑤唐晚輩得法尚雄深滿寺空遺跡何人識苦心長

廊歌雨脚破壁撼鐘音成敗無窮事他年復弔今

過淮

蘇軾

好在長淮水十年三往來功名真已矣歸計亦悠哉今
日風怜客平時浪作堆晚來洪澤口捍索響如雷

乘舟過賈收水閣二首

蘇軾

嫋嫋風蒲亂猗猗水荇長小舟浮鴨綠大杓瀉鵝黃得
意詩酒社終身魚稻鄉樂哉無一事何處不清涼

又

曳杖青苔岸繫船枯柳根德公方上冢季路獨留言已
占蒲魚港更開松菊園從茲來往數兒女自應門

郊祀慶成

蘇軾

帝出乘昌運天心予太平文章三代繼制作七年成大
祀乾坤合剛辰日月明泰壇朝掃地魄寶夜垂精仰御
圓蒼蓋環觀海岳城北流吞朔易西極落攬搶升燎靈
光荅迴鸞瑞霧迎需雲徧枯槁解雨達句萌可頌非天
德因箴亦下情民言知可酌帝謂本無聲富國由崇儉

新年在好生無心斯格物克己自消兵化國安新政孤
臣返舊耕還將清廟什留與野人賡

新年二首

蘇軾

小雨暗人日春愁連上元水生挑菜渚煙濕落梅村晚
市人歸盡孤舟鶴踏翻猶堪慰寂寞漁火亂黃昏

又

北渚集羣鷺新年何所之盡歸喬木寺分占結巢枝生
物會有役謀身各及時何當禁畢弋看引雪衣兒

倦夜

蘇軾

倦枕厭長夜小窗猶未明
孤村一犬吠殘月幾人行
衰鬢久已白旅懷空自清
荒園有絡緯虛織竟何成

次韻江晦叔

蘇軾

鐘鼓江南岸歸來夢自驚
浮雲世事改孤月此心明
雨已傾盆落詩仍翻水成
二江爭送客木杪看橋橫

次韻公定世弼登北都東樓二首 黃庭堅

真皇多廟勝仁祖用功深
卜宅遷九鼎破胡藏萬金
百

年休戰士當日縱前禽欲斷匈奴臂不如留此心

又

漢皇勤遠略晚節相千秋不足中原地猶思一戰收聖
朝方北顧斜日倚東樓廟算知無敵寒儒浪自愁

歲寒知松栢

黃庭堅

羣陰彫品物松栢尚桓桓老去惟心在相依到歲寒霜
嚴御史府兩立大夫官犧象溝中斷徽絃爨下殘光陰
一鳥過斬伐萬牛難春日輝桃李蒼顏亦預觀

款塞來享

黃庭堅

前朝夏州守來款塞門西聖主敷文德降書付狄鞮
羣裘瞻日月勢面帶金犀殿陛閒干羽邊庭息鼓聲永輸
量谷馬不作觸藩羝聲勢常相倚今聞定五溪

神宗皇帝挽詞二首

黃庭堅

文思昭日月神武用雷霆制作深垂統憂勤減夢齡孫
謀開二聖永命對三靈今代誰班馬能書汗簡青

又

鈞築收賢輔天人與聖能輝光唐六典度越漢中興百
世神宗廟千秋永裕陵帝鄉無馬跡空望白雲乘
次韻崔伯易席上所賦因以贈行 黃庭堅

迎新與送故渠已不勝勤民賣腰間劒公寬柱後文諸
郎投賜沐高會惜臨分去國雖千里分憂即近君

司馬文正公挽詞二首

黃庭堅

國在多艱日人如大雅時忠清居沒世孝友是生知加
壁延諸老橐弓撫四夷公身與宗社同作太平基

又

毀譽蓋棺了于今名實尊哀榮有王命終始著民言
蟬冕三公府深夜獨樂園平生兩無累憂國愛元元

范忠文公挽詞二首

黃庭堅

信道雖常爾知人乃獨亨書林身老大諫紙字欹傾
鰲去三山動人危五鼎烹保全天子聖几杖送餘生

又

公在昭陵日文章近赤墀空嗟伏生老不侍邇英帷去

國幾三虎聞韶待一夔誰言蓋棺了新樂鎖蛛絲

和荅錢穆父詠猩猩毛筆

黃庭堅

愛酒醉魂在能言機事疎平生幾量屐身後五車書物
色看王會勲勞在石渠拔毛能濟世端為謝楊朱

次韻秦少章晁適道贈荅詩

黃庭堅

二子論文地陰風雪塞廬寧穿東郭履不奉子公書士
固難推挽時聞有詔除負暄真得計獻御恐成疎

和文潛舟中所題

黃庭堅

雲橫疑有路天遠欲無門信矣江山美懷哉謫逐魂長
波空永記佳句洗眵昏誰奈離愁得村醪或可尊

漢陽親舊携酒追送聊為短句

黃庭堅

接浙報官府敢違王事程宵征江夏縣睡起漢陽城鄰
里煩追送杯盤瀉濁清祇應瘴鄉老難荅故人情

次韻廖明略陪吳明府白雲亭宴集

黃庭堅

江淨明花竹山空響管絃風生學士塵雲繞令君筵百

越餘生聚三吳遠接連庖霜刀落鱠執玉酒明船葉縣
飛來鴛壺公謫處天酌多時暴謔舞短更成妍唯我孤
登覽觀詩未究宣空餘五字賞文似兩京然醫是肱三
折官當歲九遷老夫看鏡罷衰白敢爭先

贈楊明叔

黃庭堅

窮奇投有北鴻鵠止丘隅我已魑魅禦君方燕雀俱道
應無芥蒂學要盡工夫莫斬獐狙杙明堂待棟桴

閒居有感

李宗易

進退荷君恩孤懷豈易論以閒銷日月何力報乾坤
上書千卷花前酒一樽相持兩成癖此外盡忘言

江上逢晁適道

崔子方

渺渺連江雨微微到面風主人留一餉佳士得相逢
會面嗟何晚論詩許有功君家好兄弟更覺此心同

荷花

豐稷

桃杏二三月此花泥滓中人心正畏暑水面獨搖風
淨刹如金湧嘉賓照幕紅誰歌採菱曲舟在曉霞東

寄鄭介夫

畢仲游

鄭子安強否梅花萬里春如何投虎穴直欲犯龍鱗
北闕今無數南方信有人可憐妻子在年少不謀身

春日獨遊南園

楊蟠

天淨鳥飛遠路幽花自香春風吹草木野水滿池塘
事去青山在人間白日長興來搔短髮微意久難忘

聞赦有作

張舜民

擊鼓填街道傳聲過水濱國嚴三歲禮恩洗萬家春
舟

楫親南斗衣冠拱北辰
嶺南並嶺北多少望歸人

曾子固挽詞二首

陳師道

早棄人間事真從地下游
丘原無起日江漢有東流
身世從違裏功名取次休
不應須禮樂始作後程仇

又

精爽回長夜衣冠出廣庭
勳庸留琬琰形象付丹青
道喪餘篇翰人亡更典刑
侯芭才一足白首太玄經

司馬溫公挽詞二首

陳師道

恭默思良弼詩書正百工事多違謝傳天遽奪楊公一代風流盡三師禮教崇若無天下議惡美併成空

又

百姓歸周老三年待魯儒世方隨日化身已要人扶玉几雖來晚明堂訖授圖心知死諸葛終不羨曹蜍

登城樓

陳師道

城郭春容晚因行可當遊飛來雙蛺蝶目盡一浮鷗峽嶮山將合江平水却流同來端興盡為且小遲留

和王子安至日

陳師道

物理有終極人情從往還
陰陽消長際老疾去留間
申白徒懷惠巢由不買山
更歌吾和汝風日稍侵顏

送吳先生謁惠州蘇運使

陳師道

聞名欣識面異好有同功
我亦慙吾子人誰恕此公
百年雙白鬢萬里一秋風
為說任安在依然一秃翁

懷遠

陳師道

海外三年謫天南萬里行
生前只為累身後更須名
未

得平安報空懷故舊情斯人有如此無復涕縱橫

張芻令餘杭

孫處

經年獨窮處此去豈無營最近吾民病無嗟縣令名官
卑人易信政肅化方行更有論心處前溪水正清

種圃

張耒

僦舍亦為圃從人笑我癡自求佳草木仍挿小藩籬吾
事正如此人生聊自怡霜松未及尺獨我見奇姿

近清明

張耒

斜日去不駐好風來有情江城過風雨花木近清明水
樹閒照影山禽時引聲吾年行老矣淹泊蹇何成

晨興

張耒

端居歲已宴杖屨亦蕭然雲露窓前日秋明樹外天大
江寒欲落諸嶺霽逾鮮白首無聊劇昏昏只醉眠

都梁亭下

張耒

金塔青冥上孤城莽蒼中淺山寒帶水早日白吹風人
事劇翻手生涯真轉蓬高眠待春漲鮭菜伴南公

舟中曉思

張耒

樹色未啼鳥，槳聲初度航。
客燈青映壁，城角冷吹霜。
飄泊年來甚，羈游情易傷。
年豐清潁尾，吾計亦差良。

南澗月夕

俞紫芝

華髮念秋晚，青燈憐夜長。
香團菊花露，寒著橘林霜。
月在北窓底，人行南澗旁。
婆娑不知去，身興兩俱忘。

廣武山懷古

劉季孫

楚漢兵相接，乾坤晝亦暝。
虎爭千里震，龍戰四郊腥。
故

壘從誰問嚴祠自昔靈北風吹敗木落日任飄零

春日遊金明池

李昭玘

日有江湖思坐無車馬塵橫橋自照水啼鳥不驚人輦
路晴飛絮宮門暗鎖春多情老園吏灑地喜相親

獨步懷元中

洪朋

淨盡西山日深行城北村琅璫鳴佛屋薜荔上僧垣晴
雨慰枵腹夕風清病魂所思渺江水誰與共忘言

宿范氏水閣

洪朋

枕水鑿疏櫺雲扉夜不扃灘聲連地籟林影亂天星人
淨魚頻躍秋高露欲零何妨呼我友乘月與揚舲

石牛莊閑居

崔鷗

不識春風面知從底處來紅深桃靨破綠靜水簾開物
外心常掛人間事不諧從今江海去無復世推排

見黃太史

高荷

萬里南溪郡黃香得賜環盛名喧海內推翮返雲間太
史資誠峻郎官選亦慳朝廷才特起堂奧峻誰扳一夢

追前事羣公厄後艱中傷皆死禍放逐罕生還別駕之
戎焚僑居傍草菅想知諳鳥道聞說異人寰楊子家元
窘王維室久鰥鵬來心破碎猿叫淚浹潺達觀終難得
羈愁必易刪衆情相惻憫靈物自恬憫迴閣澄秋晚幽
窓聳夜跼蜀天何處盡巴月幾回彎墜履魂空斷遺弓
涕忽潛石門淒殿楯銅雀慘宮鬟帝統聯仁聖皇恩感
豔頑網羅疏黨禁誅蔓掃朋姦點檢金閨彥凋零玉筍
班尚令宗廟器遙隔鬼門關拊髀咨詢及含香誥命頒

笑談趨赤縣吟詠落烏蠻奏記懷東觀移文領北山應
將九遷待未補七年閑士愧千鈞弩身謀五兩綸退藏
欣望氣延仰竊窺斑昌谷詞源窄浯溪筆力孱斲輪深
類扁投斧欲隨般鵠卵真能伏龍鱗敢冀攀不嗔無紹
介試遣略承顏

題折氏下城南

吳則禮

繫馬後河川可人冬景妍要看花到地付與水浮天未
覺隨戎馬端來喚酒船誰云是關塞勝事總堪傳

春日書懷

潘大臨

舟楫凌漳水，風濤接蠡湖。
龍媒成跬步，驪頷脫微軀。
樂土供遊戲，深文苦繫拘。
胸中雖磊砢，牆外或歌呼。
老去嵇康懶，歸來甯子愚。
千鍾真臭腐，十畝借膏腴。
春雨何曾密，園花竟自都。
小橋藏細柳，方沼出新蒲。
酒熟拈巾漉，經傳帶雨鋤。
行盤隨所有，坐客幾時無。
日轉槐陰暮，門通鳥徑迂。
仰頭看哺鷁，引手亦將雛。
撫事盆繅繭，勞生戶轉樞。
形骸浮大塊，毛髮燎洪爐。
世論幾膠柱，人心

盡好竿屠龍非至計射雉屈良圖借箸方隆漢推枰已
滅吳從渠畫麟閣吾自著潛夫

江上晚步

潘大臨

白鳥沒飛煙微風逆上船江從樊口轉山自武昌連日
月懸終古乾坤別逝川羅浮南斗外黔府若何邊

題呂少馮聽雨堂

李彭

碧澗寒侵屋幽雲夜度牆貪看山入坐怪聽雨鳴廊苦
乏陰鏗句聊登孺子牀非君無汲引寄傲學潛郎

春日有懷

林敏功

風高收雨急日薄過窓微
梅萼初迎臘春溪欲染衣
形容今日是遊衍昔人非
節物關愁者歸鴻正北飛

訪徐冲晦

郎簡

湖上訪高士徑深行綠苔
應聞山犬吠知是野人來
岸幘出相接柴門自為開
林間清話久薄暮榜舟回

宋文鑑卷二十三